

So472


Regd.No.19134/88 <http://www.kbc.org.in> NAI/220/99
No-G-4/Regd.Magazine.KBCThuso/MNP-81



KBC|THUSO

Kum 55 lhinna

Lhalam/September 2018



Christian Education

OCTOBER EVENTS : 07 - YOUTH DAY | 14 - MBC DAY OF PRAYER | 21 - CHATE NIKHO | 1-31 PASTOR TOUR EXCHANGE

"Kapa theng, eini pumkhat ihi bang a amaho jong
pumkhat ahitheina ding un, Nangman amahohi hong in"

John. 17:11



**KBC Women Secretary lamkaina in Nute phabep
13th ABWU Conference. Penang, Malaysia 29 Aug.-1 Sept. 2018**



**14th August akon in KBC Mission Secretary in interna
tional Field Tour ana bol in 1st September nin dam in
ahung lhung kit tan ahi.**

CONTENTS

THUMAKAI HO

1. Editorial/Christian Education	1
2. Christian Education Sunday/Rev. Onthang Haokip	5
3. Chriatian te chonding dan/Jangminthang Haokip	9
4. Shalom Theological Seminary/Rev. Silas haokip	12
5. Mission natoh hungkipatdan/Rev. Henjalen Doungel	15
6. Mission Column	17
7. Women Column	22
8. Youth Column	24
9. Literature Column	28
10. Education Column	30
12. Obituary	31

EDITORIAL BOARD

<i>Chairman</i>	: Rev. Dr. HawIngam Haokip, President KBC
<i>Editor</i>	: Dr. M. Thongkhosei Haokip, General Secretary
<i>Joint Editor</i>	: Rev. Henjalen Doungel
<i>Contributing Editors</i>	: 1. Rev. Letpu Kipgen 2. Rev. Onthang Haokip 3. Rev. Kaikhokam Chongloi 4. Pastor Paokhohao Haokip 5. Pastor Satminlen Khongsai
<i>Cir. Manager</i>	: Ms. Lhingjanem Haokip
<i>Design & Layout</i>	: Hemkholen Haokip

THUSO LAHMAN

Church/Organisation/ DepartmentRs. 300/-
IndividualRs. 200/- (Post a Rs. 250/-)

Indian Overseas Bank, Imphal Branch
A/c No. 073201000000350 IFSC No. IOBA0000732

The General Secretary,
Kuki Baptist Convention,
Opp. DM College, Imphal 795001, Manipur
email: kbcindia@rediffmail.com

Advertisement bolnom hon Mobile No. 8131803543 Contact thei.
Circulation to kisai lam Mobile No. 9862633173 bol ding.



“ Christian Education”

Editorial

“Ngaiyin vo Israel ... chule hichengse hi nangman insunga natoupet hihen lang lampi dunga navale pet hijongle, nalup pet jeng hihen lang nathodoh pet hijongleh, aboncha hi nachate naseipeh a lunglut mongmonga nahil jing jeng ding ahi. Deut.6:4ff

“Chapang chu achonna dingdola kilomin khoukhah-in, chutileh ateh geiya jong hichu asuhmil lou ding donlouva akoi lou ding ahi. Prov.22:6;

Thumakai:

Amasatah in muntina um Kuki Christian chate jouse ahideh a KBC member ho jouse chungu i Pakaiyu Jesu Christa minin salaam kahinpe cheh uve. Tulha thupi chu Christian Education ahi toh kilhonin, hiche thudol ah chomcha ana kihoulim u hite.

Christian Education kiti hi ipi tina ham?

Christian Education kitihi Christian kihilna/ Jilna tina ahi. Hichu Christian dan toh kitoh a kihilna leh hung seiletna ahi. E.G. White in themjilna aseichetna a, “Themjilna kiti chun tahsa, lungthim chuleh lhagao abona kibang tah a khantouna chu ahi”, ati. Sappauvin, “Education is the harmonious development of the physical, mental and spiritual powers”.

Mikhat a kona insung, insunga kona veng ahilouva ahileh houbung ho chu themjilna neitah le thil hethem ahiu ngaiyah ahi. Mihem khat chu themjilna anei teng insunga, louma a atoh ding athamding ho boilouva amolso nadinga lunggel natoh anei ding ahi.

Chuti banga chu, houbung jong chu amember ho hinkho – thilpeh hihen mopohna dang dang ho ahiding banga asuh bulhit lou teng houbung chu pilhing loulai ahin, lhagao themjilna ngai ahiye. Hijeh a chu Christian education ngaiyah ahin, akhohsah na kiseina chu ahi.

Christian Education hi ipijeh a ikhohsah diu ham?

Christian Education hi Bible in aseijeh a ikhohsah diu ahi. Bible a kona abaipena het ding leh kihilna ding chu chungu Bible chang kipe teni le adang tamtah jong ahi. Israel te namkhat ahinauva thupeh masa le alenpen chu, “Ngaiyin vo Israel, na Pathenu khatseh ahi. Anina a, nalungthim pumpiu le na thanei na pumpiuva na Pathenu na ngailut dingu ahi ati. Hicheho jouse boltheina dinga kihilna phatah ngaiya ahi.

Hitia chu Judami mipa khat chun hichengse hi ainsunga atoupet hihen lang lampi dunga avale pet hijongle, alup pet jeng hihen lang athodoh pet hijongleh, aboncha hi achate aseipeh a lunglut mongmonga ahil jing jeng ding ahina thupeh imu uve. Christian te jong chutobang ma a chu kihilna ngaiyah ihiuve. Labolpa’n, Pathen lekha simjinga, asun ajana ngaitoa, athulu ching jing jengin Phattheina hinkem louna...” atibang mopohna ineyui.

Thuhilpa chun chapang chu achonna dingdola kilomin khoukhah din, chutileh ateh geiya jong hichu asuhmil lou ding donlouva akoi lou ding ahi ti eikiseipeh u ahi. Amongin, mihem khat achapang laiya thu hoitah a kimop chapang chu ahinko lhum

keiya moh chekhel ngailou ahi. Roman Catholic hon achepiu chu catch them young, tichu aneo laiyin manin tina ahin, muntinna chapang matna in aneyun ahi.

Athumna ah, iPakaiyu Jesu Christa'n, "Amahon hinna aneyuva, anei letsetna dinga hungah kahi" (John 10:10) atihin, tahsa, lungthim chule lhagaova kibang tah a khantouna leh ga neitah a hing dingin iPakaiyun eidei uve. Leisetna ahung lona khat jong ahi. Chule, mihem chu changlhah jenga hinglou ding ahin, Pathen thu a bou hing ding ahi ati. Ilungthim, tahsa chuleh lhagao kibanga akhantou lou tenga ahileh Pathen in eiguonpeh bang ahipon, Pathen natohna a dinga idei bang tah a kitong molso jou louvah ahiye;

Lungthim leh lhagaova lhahsam na chun society leh houbung sunga kibung khenna muchi leh boina chom chom ahin pohlut jia, hitia chu lekha hetlouna (illiteracy), vaichat, corruption, kitha-kimat chuleh adang dang ahin pohlut ji ahi. Chuleh, Convention in themjilna mun ho angaichatna munhoa pat angailheh tan ahi. Education tilou society kikhelna ding umbeh seh lou tobang ahi

Christian Education hi iti ikhohsah diu ham?

Christian Education phatah a hung umna thei dinga, a ngai masapen chu insung ahi. Insunga kona Christian Sakho kichuhna hung kon ah ahi. Insung Maicham kistemna munhoa hung kipan ding houbung a Sunday School le Pathen thu phatah a kilhangsapna/kijah na mun, chule kholaiya themjilna school phatah a kai chun themjilna pha ahin polut ding ahi.

Insung jouse a Maicham khohsah cheh ding hi ahi. Insung Maicham kistem louna a kihilna aum theipon, minu le mipa in chate khohsahna alhasamin, chaten minu/mipa jana alhasame. Hichehi jatdan hammah, kol le vaiho lah a vang

dihlou maithei ahin, eiho lah a vang maicham semloute chu kihilna lhasam ahiuve. Insunga kihilna phatah aumlou teng le chapang/nungah-gollhang chu ahina ding ban tah a kikhou khah lou ahin, society a mi suboi ho ahitauve.

Anina a, houbung sunga Sunday school phatah a khohsahna/neina ngaiya ahi. Amongin, Christian tuhil chu Sunday school a akim jep e, ajeh cu iboina ho, hetchet louho jong thudoh umtheiya, mihil hon don-butna apah a chutia chu lungthima boinaho suh lhapa uma, hinkho lolhing tah kimang thei ahi. Chule, Sunday school a phatna kit khat chu ahile, Pathen thu ho ban nei tah a kisim/kijil thei ahi. Pastor/thusei nu/pa in adei dei aseih chu lhagao hinkho a machaalpina dinga lhinglou maithei ahi. Hichena dinga chate Sunday school a sol tei ngaiya ahi.

Athumna ah, School a chate kaisah tei angaiye. Tulai Right to Education dungjuiya chapang khat chu class 8 chan asimna tei din right anei ahin, hiche a sol-lou ho chu chapang hon anu/apa/avesui ho chu court a aheh u le jail lutthei ahiuve. Christian missionary hon themjilna ana khohsah uve. Mission natoh atamjo chu themjilna mun hoa ahin pan jiuvin ahi.

Tulai ei Manipur a government school hoa kihilna aduhdah lou jallin private school ahung tamtan, commercialisation of education hi ahung pung lhez tan ahile mivaicha ho dingin themjilna pha ho moh mu jou dingin aum tapoi. Hicheho ven na dinga chu government facility lah ho leh school phatah a kibol louna munoa chu school phatah bola, residential (Boardin/ hostel) umsa a, mihil phaho sollut naiya ahi..

Tahsa, lhagao, chuleh lungthim abona kibang a akhantou teng mihem khat chu bulhing soh din hiti chun Christian education hung um tan tin, Pathenin asem lona jong hin kihet tante. Lunglut tah a sim jouse chungu Pathen vangpeh chang taken.

CHRISTIAN EDUCATION SUNDAY

Thupi:-

"Nangma nakichinsah chengse chu hongpha'n".

(1 Timothy 6:20)

By:-Rev Onthang Haokip
Secy. Christian Education Board, KBC

SERMON

Ipijeh a Christian Education Day imanju ham? Ipi jeh a Houbung in Christian Education hi kivaihomna bahkai khat ikokhoh uva ikisah lel piu ham?

"Christian Education Sunday" hi kumsih a ihinman jing u, Events Calendar'a dungjuija September thupi hi "Education, ahilou leh Them-jilna lam" ahitoh lhon'a chung a hung kitahdoh thupi hi ikihoulimna diuva deisah ahin, KBC thuso simjouse leh Houbung mitheng te jouse l-Pakai Christa Jesu mintheng in ngailut Salam kahinpeuve.

Houbung ahilou leh Church Organization hon 'Christian Education' ichepi diu hi thil phatah ahi. Secular lam them-jilna mun ho ah Pathen thu akiseidohjipoi ti jeh a lgam uva Missionary ho ahunglut til'uva Mission School or College ho mun tampi'a eina phudoh peh u ahin, tunichan in akhangtou jingun ahi.

Christian Education kiti lona pen hi Thepna chihna ijil u hi Pathen thu toh kitoh a, itahsan, ichena lhongpi hou, chuleh inam chondan le hindan hou kihil theina dinga Christian Institution ho tuni chan a hi iboipiu ahi. Mi tampi'n KBC ten School leh College bol louva pha ham tia seiloi umjong leh ahet thuh lou jeh u bou ahin, l pilhinsah joulou laiju jeh un seithei ahithouve. Instituion ibol lona pen u chu Pathen thu imop theina diu lunggel ineijeh u ahi. Organization dang ho, ahilou jongleh Houbung dang tampi'n jong Christian Education khohsahna lentah aneicheh uve. School le College inei hou isemtup theiju leh hichu thil phatah khonung teng ichate hou eima tahsan le dinmun a thu kihil ho dungjuija ahung khanlet diu chu doi le tup pipen ahi.

Thupi:-

Khangdong Timothy hi Lystra kho a cheng, A.D. 48 vel'a Paul Missionary kholjin masat chung a Christa tahsanna ahinneipan ahi. Apa gentile mi, anu Juda mi hou ngaisah tah ahi. Paul in akholjina a akipuile

a, houthu lam hetgilna amusah a analamkai ahi. Chihna thepna angaicha chan Paul in anahil them a chule amanchah ahidan akimui. Khonungin gollhang chapang kum 24 vel ahichun Ephesus Houbung ah ginchatna lhingset pum in Pastor in ahung pangtan ahi. Phat khat in Ephesus Houbung ah boina ahung sohtan, Timothy in kithopina ahin ngaichalhehtan ahileh Paul in Pathen thudol leh tahsa chonna dol'a thu tampi (Instructions) ahinseipeh a, achaina lam'a "Nangma nakichinsah chengse chu phaten hongphan" ti thugahna hi ahinpeh ahi. Hiche thumun a kon hin Mihem hinkho ah chintup ding thil tampi ineiju geldoh thei ahin, phabep khat abanban in seiju hite.

Tahsa damthei:- "Good health and good sense are two of Life's greatest blessings." –Publius Syrus

I Corinth 6:19 a chun "Natahsau chu Pathen Intheng, lhagaotheng chenna In ahi ti nahet louvu ham?, Nangho nangho a tum nahitapouve, man kipea kichodohsa nahitauve. koi hileh atahsa sumang ho chun

-Pathen Intheng asuhmang u ahi", ati. Tahsa damtheina din nehpha, antui akingaicha e. Hinlah mi tampin neh phalou agunei, Ju le Drug ho, khamna theijah alop un chomlou kah in ahinkhou akichailoi jitai. Hinkho hi chomcha bou ahin, hinnopna dingin kiven-

them, chihthei angailheh jengin, damthei tah leh lunglhaitah a hinkho iman diu ahi.

2. Pathen thu:- **"Take care of the Words of God and the words will take care of you"** – Amit Ray

Jn 1:1 "Atil'a chu Thu um ahin, Thu chu Pathen toh um ahi, Chule thu chu Pathen ahi", ati. Pathen chu 'thu'a um' ahina'a ihovu ahin, hijeh a chu Sinai mola Israel te thusom kipehna a chu 'Nanghon semthu muthei lim ho nahou loudiu, a ang'a jong nakun loudiu, chibai naboh loudiu ahi', ati. Pathen hou ihinau photchenna lenpen chu Pathen thu eiho a umding hi ahi. Nitin ichonnau leh ilunggel u chu Pathen thu toh akito jing ngai ahi. Ichon namlah jouseuva Pathen thu chingtup le hongpha ihijing diu angaijin ahi. Thupha Pathen thu sanga thuphalou, mi suhmangnathe, mi engkalna thu, thujou le kitomona thei thu vopnom jong aki umji e. Mitin in Pathen thu ivop uva/ichintup cheh u leh aga kimudoh theiding ho chu, kipana, chamna, kingailutna, phatna, nunnemna, kitahsan tona, kihepitona,hiho chu kilangdoh ding ahin, hichu lhagao ga ahi, ati (Gala. 5).

3. Chihna le hetna, thepna, chule talent ho:-

"Wisdom is not a product of Schooling, but of the life-long at-

tempt to acquire it. - Albert Einstein

Colosians 2:3 "Ama a chu Chihna le hetna gou jouse kisel a ahi". Daniel 2:21,22 - "Pathen in phat le nikho akhel in, kum kiheichin aumsah e; Pathen in lengho jong ahaisah a pan jong apansah ahi; Miching ho chihna jong Pathen peh ahin, thil hetkhenna neiho jong hetna apeh ahi. Pathen in thuh tah tah a kisel Aki- imm mangsa thilho jong aphonng doh jin, Muthim khojing lah a thil umjong ahen, khovah chu amatoh kikhenlou ahi". Hiche Bible chang ho kon in Pathen chu chihna le hetna, thilbol theina jouse pepa ahi, ti imuthei tauve. Pathen in eima totoh cheh in thilpeh eipeuve. Eithilpeh jouseu hi alencom aneochom aumdehpoi. Abon a ama lunglhaina a mangcha din eidei juve. Thusim khat gah-seijute. Kaneo lai H/S kasimlaijin ka ute khat Shillong a B.A. simlai lekha themtah khat ana um e. Ama chu mijousen aki-neppiu ahi. Hinlah Suty a ahungdoh hin kakivop lhon in ahileh Ju kijohna ah eipuilut in, Hethang napi le napu kom'a naseidoh lou ding hichu ong, tin hatah eigah tan ahi. Khonungin ajudon angatheitapo'n, ati akithingim imacha jong boltheilouvin hinkho ahinmang tan ahi. Ju donna din Insunga thil ho guhthim in akijoh jin, ajona lam a chun ajinu ponve jouse geijin akijoh chaitan ahi. Kum phabep jouvin Lekha themtah pachu imacha hilouvin

Uicha thibangin aki mathi dohtai. Pathen ahethlou, achi hna athepna chingtup lou ahijeh in ahinkho gentheina leh phatchomna beijin amangchaitan ahi.

Chonn le khan (Custom & Culture):-

"A people without the knowledge of their past history, origin and culture is like a tree without roots." - Marcus Garvey

John 15:19-"Nangho vannoi ja nahilouvu, vannoi ja kon'a keiman kalhendoh nahiuvin, hiche jeh a chu vannoi jin nahot u ahi". I Corinth 6:20-"Nangho nangho a tum nahipouve, nangho man kip-ea kichosa nahitauve, hijeh chun natahsa chunguvah Pathen choianun." Pathen mite ihu midang ten eihet theinau - chu ichonnau ahi. 'Vannoi chonna' tia Bible in asehi hi Pathen chate chonna toh akibangpoi. Sociologist mint-hang ho, gah het theidin; Pierre Buourdieu, Emile Durkheim teho, ahilou leh I-pu ipa tehovin

Custom Culture kicheh tah thu ho eina phudoh peh uve. Hiche ho sang a thupijo, tunia iseidoh nom u chu Pakai Jesun leija alenlaija anaphudoh chonna ho, hichu Thenna, ngailut, kihepito, kipumkhat, pohgih kingaijangto, hitobang chunglam thu ho (Rome 13:19-21), Pathen lim le mel iputnau thu hi hagelkhoh joh ding ahi. Ichon dan adih leh hichu meivah toh tekah ahi. Hijeh chun Puchon Pachon thu le

adandang a kisalel louva Pathen chate umdidol/chonna didol ho ijuithemuva chuteng ahelou, asangtheilou laiho lah a meivah banga ivah diuvin eiseipeh uve.

Nei le gou:- ***“Money is good for nothing unless you know the value of it by experience.”*** – *P.T Barnum*

Gelmasah pen ding chu Pathen a din Mihem hi Agou lupen ihi uve. Pathen gou kiusesa chu Jesu Christa thisan’a them achan a eina chohdoh kit leuvu ahitai. Psalm 24:1–“Leiset leh asunga um thil adimset’a kikoi hi aboncha Pakai-ja ahi,” ati. Athilsem jouse lah a mihem hi asah chungnung pen ihiu ahi. Eden hon chu vesuidingin Adam le Eve ngense anahilhon e. Pathen in athilsem ho vekoldinga eingenseu ahin, hichena ding chun eima kivetkol jou masah angaije. Mathew 25:23–“Sohpha tahsan umtah, nabol aphabetave; nangma themkhat chung a tahsan umtah nahin, keiman nangma tamtah chung a kapansah ding nahi.” ati. Nei le gou atam le alhom thupi hilouvin ikitahna hi thupijo ahi. Themkhat chung a kitah ho chu tamtah chung a jong

kitahding ati ahi. Hao le vai kiti thu a koiman thu akitan theipoi. Anigel a Pathen peh ahi. Hijong leh Prov.16:1-3 sung isim leh Haosatna sanga mihem pachat thei hi mantamjo ahidan imuve. Kitahna bei mihao pa sanga mi-vaicha kitahna neipa otchat umjo ahi tin Bible in eiseipeh uve. A ipi chu hitaleh ineijat u chu tam hen lhom jong leh Pathen peh ahi ti geljinga ineisun u kitahna pum’a Pathen deija manchah theija ichintup jing diu ahi.

Hijeh chun Sopite, chung a ihin-seihou; Tahsa damtheina, Pathen thu gou, Thepna chihna, chonna le khanna, chule Nei le gou ineijat hou jouse kibangtah’a deisah thu a sei doh nom pentah chu Pathen thilpeh ichanhou, chintup angaijin, hiche ho jouse sanga akhoh pen a ichintup diu chu “Huhhingna/Tonsot hinna” manbeija eipeh u hi ahi. Pah ding le ga ngeidinga vetup dingin thupeh ihiuve. Kipa man Lallukhuh sancheh theina din “Chingtup a Hongphajing” dinga ikitemnau toh kilhon in Pathen in phatthei eiboh cheh tauhen.

SUHDIHNA

JULY Iha a KBC Thuso page 27 a Diamond Jubilee committee ho list hungki sodoh na a Finance Committee member lah a Pu Seiminthang Lupho chu ana kikoi hai khat ahikha tan, Hiche chungchang a bolkhel hi phamo akisan ahungki sudih in ahi. Bolkhel na chung a ikihet them diuvin Pakai min in ikitem uve.

CHRISTIANTE CHONDING DAN

Literary Meet 2018 essay writing competition topper

*Jangminthang Haokip
B/C Chassad Avenue KBC No.1*

Sermon

Christian te chonding dan itileh sappaova seiding in "Characteristic of the Christian" ti a jong seithei ahi.

Saap te pao mama a character lost everything lost ati ahi. Hijeh a chu mihem khat hinko a athupi pen leh akhoh pen tah chu (character) chonding dan hi ahi. Mihem khat chu ching l'heh hen lang them hen lang hao l'heh jong leh aman ahikho a achonding dan a achon louleh amachu imacha hitalou, mija thei lou mi noise chu chang ahitai. Min athu alah lou mipa minu chu hiji ahitai. Hichu mihem hinkho a chonding dan athupit na chuleh akhoh dan chu ahi.

Ahin tuni a iseinom uchu ahileh mihem hinkho a choding dan mai mai hilouvin. Christian te choding dan hi ahi. Leiset chung a Hou (Sakho) tam tah a umin ahi. Vetsah man Hindu, Muslim, Sikh, Jian, Buddhist etc. etc. Hiche Hou sakho ho jouse jong hin, ama ama hou toh kitoh a chonding dan kihilna jat chom cheh aneisho kei un ahi.

Hiche achon nao ho chu ahoi, apha ahisoh kei thou in ahi. Leiset chung hinkho a ding a juithei ahilouleh kihil na dia thil hoitah chu ahithou ve. Ahin tunia iseinom u chu ahileh leiset chung a hou dang ho jouse sanga chungnung pen Christian te pakai Jesu Christa nungjui ho chon na chu ahi. Christiante ichonna dio jouse Pathen lekha bu theng sung a abon in a kimu soh kei in ahi. Ipakai u Jesu Christa in aseibang ama nungjui ding chu ama (Jesu) bang a chonding, anun akhan abon a Jesu Christa tobang ihi dio chu ipakai in eideisah u ahi.

Ngailut na ineidio hi Pathenin adei pen chonna ho lah a khat ahi. Nangma naki ngailut bangin naheng nakom ngailun ati ahi. Mathew 22:39 Ngailut na hi mijousen aneithe lou chonna khat ahi. Ahin Jesu Christa chu iungsung uva a chenna ahileh ngailut na bukim chu ineithe dio bou ahi. Ajuh chu ngailut nan leiset chung a Jolal aneipon ahi.

Aneilou te kithopi ding, Christiante chonna ding a ahoipen leh athupi

ho lah a neiloute kithopi ding hi akhoh pen ahi. (Lk 18:22) Ipakai-yu Jesu Christa leiya ana lenlai in khang dong mihau pa kommah na nei nagou akeh khat migenthei mi chaga ho pen lang kanung hin jui in ana ti ahi. Hijeh a chu neilou te kithopi ding hi Pakai Jesu Christan eina hil u chonna khat chu ahi. Mi ngaidam ding (Nabol sete ngaidam ding) Hiche chonna hi pakai Jesu Christa ama tah in leiya alen lai a ichonna dio va eina hil u chonna khat ahi (Math. 5:44)

Thulhun lui khang lai avang chun a deh in Mose dan a vang chu mitkhel a mit ha khel a ha anati ahi. Ahin Jesu Christan vang'in na ngeiphe lang khat abeh leh lang khat jong do peh in ati ahi (Math.5:38) Ajeh chu phulah chu kakin ahi ati. Hijeh a chu phulah ding hi Pathen kin ahin eiho Christiane ding ahipoi. Hiche chonna hi Pakai Jesu Christa nungjui ho ding chonna khat chu ahi.

Jin dot them leiset hinkho inei sung uva hi inn a maljin jong inei dio ahi. Hijeh a chu jin dot them jong hi Christiane chonna lah a ahoipen khat ahi. Ipu u Abraham jong chun jindot atep jeh in Pathen Pathen lhagao theng ana kipa sah in ahi. (Genesis 18:1-8) Ihet mi hihen lang, ihet lou mi hijongleh Christian khat ihijal a chu jin dot them ding hi Pathen in ei-deisah u ahi. Christian khat ihijal a chu ichonnao a hi thu isei dio ahi. Adeh in ichen nao Manipur gam

sung a ichen khom pi (Meilhei) Hindu ho hin Christiane chonna hi aha vetlhih jing khat chu ahi. Hijeh a chu midang te ho vetjui thei a ichon u hinam tihi ikiha khol pen dio ahi (I Peter 2:12).

Christian khat ihi a jukham jing khat chu midang ho nuisat beb ihi dio ahi. Chuleh eiho chonna adih lou jeh a christa thupha hi non Christian ho lah a iphon jal jou lou u ahi. Example neokhat sei ute. Motbung area a cheng Nepali ho kommah pathen thu aga sei uvin ahileh. Nepali ho chun hitin ahin bon but uvin ahi. Hiche te kho ho pathen chu ham. Amaho pathen chu ahileh vang keihon kahou nom pouve ahin tio vin ahi.

Ajeh chu Christian khat ihiova guhchat, jousei kinah kibou ibol uhi pathen lenggam machal na dia a daltan a chu ipan u ahitai. Neh le chah a kitup ding, Christian khat ihi a ahileh neh le chah a control iki ha bol dio ahi. Henge Bible a vang Beri, Khaini, Churup, Drug kiti ho vang akisun poi, hijeh a chu hiche ho chu nehding ahipoi Bible in atheng a dei ahi. Ipakai u Jesu Christan jong ithen dio a dei ahi. Thenna hinkho manding hi Christian te chonna ahi (1st Peter 1:15)

Kiseiset kiti hi Christiane chonna hilou hel ahi. Thu kithim hou jeh a hi thil tamtahasuhboi thei ahi adeh in numei hon ahabol nom un ahi Ipakai uvin adei lou hel ahi. Pathen thu machal theilou hel a

aum hi Christiane ichonnao hi mi muthei mi dangte juithei lou a Hinkho iman lou jeh u ahi pen e.

Ichonna hi meivah ahi. Apha a ichon u leh midangten, vah u chu amudio aphilou va ichon u jongleh apha lou a ivah a chu midang ten amu dio ahi. Thil apha leh apha lou hi mijou sen amu uva thutan (Judges) abol u ahin. Hih chun Christian ten ichonnao hi sudih utin. Ivah u hi midang te mu thei din Domsang ute. Eiho chonna jeh a Pathen helou khat pathen ihet sah uva meivah a ip-

uilut u chu Pathen natong dih tah ihinao chu ahi. Mathew 5:16.

Tunin Christiane chonna ding tamtah umjongleh, chung a chom cha ihin sei u ahin. Hicheng she jonghi phaten pathen kithopi jal in jui cheh ding in pan athah be in la phao te.

Mihem hina a iseikhel u iseival u aum jong leh Pathen in eingaidam u hen. Iseikhah nao ho Pathen in maban hinkho a din phatthei eiboh peh taohen. Kakipah e.

KIPA THUSEINA

1. Date 22 August 2018 ni in Centre Church New Lambulane a um Pu Letthang haokip le Pu Haopu Singait Mission secretary chule Rev.Ibomcha Singh, Supervisor Meitei Area amaho cheng kithokhom nan Top Siphay mun ah Zakai Ministry anabol u chu lolhing tah in anakichai tai. Hiche nichun mihem 190 vel akikikhom doh in chule Jesu Christa katahsan mongmong e tin mihem 92 velin khutdopna aneiuve. Hiche Ministry hi kineppi umtah Centre Church New Lambulane Imphal ten Sponsor eibolpih u ahi. Amun ahchun Ministry kibollona thudol seina akineijin, mipin lunglut tah taokhomna akinei in Programme akichaitai.

2. Moreh Canan-veng Ward No.7 "Tahchapa Gym" President pa Pu Hollal Haokip in ngailutna neitah a Moreh Meitei Baptist Church Ground Cement Plaster eibolpih nachung uvah kipa thu seijoulou kahinphong e. Tuhin hilai munhi ahoipen/aphapen/anompen asohdohtai. Pathen in ama le ainsung mite malam a anatoh naovah phungvuh jing taken. Chule hiche Ground hi chaitheng ahitoh Ihonin Dt, 9th September 2018 nin Pakai lhacha Rev.Ibomcha Singh Supervisor Meitei Area in thenso nale lhandohna aneitai

Rev.Ibomcha Singh
Supervisor Meitei Area KBC

SHALOM THEOLOGICAL SEMINARY

Tu Dinmun le Khonunga dinga Lungtup ho

*Rev Silas Jangminlen Haokip
Director STS.*

Sermon

Bible College khat neidoh teiding tihi Pathen in KBC lamkai ho lungthim sunga anakhum a, hichu ol-ol a hung khanglen len a, June 2011 achu KBC office muna hiche Bible College hi inaugurate ana kibol ahi. Abul achun Leadership Training Institute (LTI) ana kitin, kumkhat le nivei Lay Leader Training program ana kineijin ahi. Phat chomkhat jouvin, B.Th le BD/M.Div degree changei pehna thei muna semdoh ding lungel ahung umtan ahi. Hitoh kilhon chun KBC Constitution Revision 2015 kum chun theological degree lhingset kijilna thei ding muna semdoh ding ahi tin Constitution a jong jihlut in ana um in, chuleh amin jong Shalom Bible College tin ana kikhel in ahi. Bible College kiti hi alhangpia undergraduate degree chan pehna hoa kimang ahi in, ahin eihon itup uchu graduate course changei kichuhna mun hiding akiti jeh in KBC General Assembly 2017 chun Bible College akon in Theological Seminary in ana kikhel kit in tu le tu hin hiche min chu aum jing in ahi.

TU DINMUN

1. *Tup le Doi*: STS hi hop jaotah a khangtouna mun le themjilna mun, Houbung a vaihom dingho kichuhna mun hiding, houbung miho Bible a kon kihilna kipehna na mun jong hiding ahi. Chuleh, Houbung le society khangtou machalna, Pathen lengam kehletna dinga kisinsahna mumpi hiding ahi.

2. *Administration Umdan*: STS hi KBC in aphudoh chuleh KBC General Assembly in alhengdoh Theological Board ho vetsuina noiya um ahi.

3. *Jilkung ho*: Tu le tuhin full time teaching faculty mi ni (2) aum in, chuleh part time teaching faculty mi nga (5) aum in ahi. Amaho chu

- i) Rev. Silas Jangminlen, Director
- ii) Mr. Ginneo Haokip, Old Testament
- iii) Mr. Seikholen Kipgen, Warden

- iv) Mr. Jamthenlal, Theology & Christian Ethics
- v) Mr. Lalboi Dounyel, New Testament
- vi) Pastor Onkho
- vii) Pastor Haoneo

4. *Simlai ho*: Tu le tu hin simlai mi 14 aum uvin, EBCF a kon mi 1, ECI a kon mi 1, Myanmar akon mi 2 (Kachin 1 le Kuki 1), Hindi Baptist a kon mi 1, chuleh adang hohi KBC Gambih chom chom akon ahiuvin ahi.
5. *Library*: Tu le tuhin Library a lekhabu 4000-5000 vel bou aum in ahi.
6. *Permanent Site*: Achesa 2017 kum chun Saitu le Thingbongjang teni gam akigom in pari 6 tobang akichodoh in, tutu hin amuna ima akibolpan thei hih laijin ahi.
7. *Temporary Campus*: Pu Ngamthang Haokip in STS temporary campus a dingin Gamnom Sapormeina muna building 3 eipeuvin ahi. Building khat hi Room 5 le toilet 3 ahin hiche hi hostel le library in aki-mangin ahi. Building nina hi Room 4 le toilet 2 ahin office le classroom in kamangin ahi. Building athumna pa hi Room 4 le bathroom 1, toilet 1 ahin, faculty mi 3 in alokhom uvin ahi.
8. *Accreditation*: Tule tu hin STS hin accreditation le affiliation akinei theijep naipon ahi. Ahin, amasapen a dingin tua B.Th a hunglut ho a graduate masang ngei uva ATA Associate Membership beh muthei hiding ham tihi aki ngaito laitah ahi.

VISIONS AND GOALS

Vision le goal hi hopni a hopkhen thei ahi.

Short Term Goals

1. Senate of Serampore noiya B.Miss hi agang theipen introduce bol ding (B.Miss chai hon Serampore noiya BD a continue thei u ahi)
2. ATA Accreditation agang theipen a boldoh ding
3. Kum 5 sunga Library Lekhabu 20,000 chohdoh ding
4. Accountant, Cook le Librarian neitei ding

Long Term Goal

1. Kumseh le Head Deacon/Secretary mi 100 training peh ji ding
2. KBC Existing worker ho Refresher Course neipi ji ding
3. KBC a worker kilathah ho orientation program facilitate bol ding
4. Major Department (NT, OT, Theology, Church History, Mis

sion etc) ho oja neikim ding

5. Faculty ho higher study lampi sempih ding

6. Permanent site muna insah natoh pat ding

FUTURE PLANS

1. Shalom School of Music: Hiche hi professional music jilna hiding chuleh houbung dunga music lamkai ding ho short course peh ji ding
2. Shalom School: STS a jilkung ho chate, staff ho chate chuleh ji le cha nei simlai ho chate dinga kindergarten school khat neiding
3. Shalom Healing Centre: Clinic le Counselling centre kigom hiding, tahsa dammo le lungthim/lungel chuleh lhagao lama dammo ho vetkol namun hiding
4. Shalom Care Centre: Hiche hi chaga hole avesui ding umlou kumtam ho kivetkol na mun hiding
5. Shalom Village: Gambeh tum khat a staff, faculty le married student ho chenna mun hiding ahi.

TU LE TUA NGAICHAT:

Houbung miho panlah nathei

1. Simlai ho Sunday practical ministry a ding leh marketing a manchah ding, chule chele vale na a manchah ding vehicle ngaichat na lentah aum in ahi.
2. College Library a ding le Office a manchah ding Deskstop Computer 2 ngaichat ahi.
3. Xerox copier alenho khat ngaichat ahi
4. Student Sponsorship: Student sponsorship hi jatthum in akihom khen in ahi
 - a) Full Sponsorship = Rs.2,000 per month
 - b) Partial Sponsorship = Rs.1,500 per month
 - c) Half Sponsorship = Rs.1,000 per month

TAONA NGAICHAT HO

1. Simlai ho, Faculty ho chuleh Board member ho ding
2. Accreditation muthei nading
3. Permanent site muna insah natoh agang theipen a pat thei nading
4. Pathen in STS muna tokhompi ding loipha eipeh nadiu

KUKI BAPTIST CONVENTION

MISSION NATOH HUNGKIPET DAN

THUSIM

ACHOM LAMA KAHINSUT AHI

Kum 1974-86 KBC gamsung ah huhhingna, pentahna, ahung kipanin, huhhingna loupitah ihin kisan uvin, thina lim a touho atonsot gamdiu kimudoh louho pohnetna jallin miphabep in anei agou itlou hellin ahinpeovin, chule thusei lasah ahungkibollin Houbung tinna jochan in Camp, Crusade, Houbung neo, Houbung len umlou pentah thu ahung kiseijin, hiche akon a mipengthah hon apengthah louho ahinpohnet uva kon in Challenge akibolle kipehna jalla Mission natoh hung umdoh ahi. KBC a huhhing nathu ahunglut masang in Houbung phabeppi hi 1) Fundamental a chomdoh 2) CRC a chomdoh 3) New life a chomdoh 4) UPC a chomdoh 5) RCM a chomdoh 6) Isreal Mes-sainic le Judaism a chomdoh hitabang hi anaum in ahi.

KBC Mission kivaihomna 1985-86 Kholep Assembly a kivaipoh le Houinn kai hung kipan doh a Weekly a Wednesday nilhah hi Mis-sion Service a dinga hung kiphatsah ahi. Chule kivai homna ding As-sembly aboldiu, Council jong abolthei diuva phatsahna hungkinei pan ahi. KBC Mission President masapen pu Lalkholun Honourable Captian, Vice President Rev, Lenkhosei Kipgen, Pastor Gambih No.3 apohlai ahin, Mission Secretary masapen Rev. Yangthong Haokip De-partment dang hotoh kivaihomna kibang chet in kum phabeppi ana kichepin, hilai chu Mission natoh thanop aumlai tah ahin, Mission kivai homna ahung kikhellin, ichan hamkhat in milung ahinsudai lhez jeng e.

1989 kum in Mission Fellowship Sapormeina mun a March Iha in anakibollin thupi seijin Rev. Dr. Khaizakham anakimang in akikhom dohjat mi 13.000 ahin, Khoppi dangsang in mi atamjoi. Sunday Sun in thuseipan mipi chouna anei jin ahileh Pathen natong ding a hung-kipe doh, Pakai lengpi leija konding hihen, neile gou, nihchen, ponsil, Pung(Watch)sangkholchol, suit agom a sum a akihei dohchun sum

a Rs.92.000 alhing e. Hichea kipat chun Houbung miten thanopna athahbeh in ahin neipan kittaovin,hiche apetchun tahsan kitepna ahung kibollin, sum a hihen thil le lo hijong leh aboncha a KBC Mission Office a ahin thah lut soh keijiu ahi.

Akisei bang in Mission kivaihomna ahung kikhella Assembly le Council kisubeija Mission Board joh a ahung kikhel phatin,Board Chairman masapen chu Pu Thongkholun DOUNGEL Langol Vice Chairman Rev. Lenkhosei Kipgen keima kapangjom nalaije. Recording Secy, chu Pu Jangneo Kipgen Langol ahi. Hitihin kivaihom nahi tuni chan geijin Mission natoh anache lhan ahi.Pathen phatthei bohna jallin,Secretary thahthah in ahinpoh phatin,kivaihom nahi ahungpha jepjep in ahile mipin jong thanopna le helna ahin neikittaovin,Mission natoh ahung-machal toupeh in,tunin sangtah igeithei taovin ahile Pathen kathang-vah e.

Tuban injong Pathenin amite hungvil jingintin,vaihomhon jong kipah le thanom tahin mipi thanop nathei chan lungthim napeovintin,thina lim a touho salvahding le Pathen in eingense nao kin thupitah ho toh molsoa aumthei nadin Pathen in KBC umpijing taken AMEN.

Keima Pakai lhacha
Rev. Lenkhosei Kipgen
Retire Pastor, Molpheitampak B/Church-8

BIO DATA

Rev.Lenkhosei Kipgen s/o (L) Paokhohen Kipgen
Date of birth 03/03/ 1944
Penna gam Kangchup Songjang,Tamenglong Distrct Manipur
Tua kachenna Molpheitampak Baptist Church KBC - 8
Pathen na kanatohna kum le munho
1944-1970 L.K.B.A Youth President amasapen kanahi.
1970-1982 KBC Youth President amasapen Kanahi.
1983-2000 L.C Pastor Mission Vice-President Term 3 kanapo e.
2000-2005 Reverence kana hitai
2005-2014 Re-Appointment &KBC Vice-President & CEC Term 3 kanahi e.
2005-2008 Kumthum hi Karbi-Anglong a kana um e.
2010-2014 April T.Vaichong Centre Church kana um e.

Mission Column

SOUTH EAST ASIA (SEA) MISSION FIELD VISIT 2018:

Rev Henjalen Doungel
Mission Secretary KBC

Kuki Baptist Convention in Foreign gam Mission natoh hi 2014 kumin inapan un ahi. South East gam China, Cambodia chule Laos gama ina lut un ahi. Tuni chanin agam pao jilnale Pathen thu seiphong na jochan in ahin neiun lhaseh in anatoh nao report aphant chan office a ahung lhung jing in ahi. Hinlah Missionary ho natoh le dinmun hi amun taha hatchet na neiding le mabana itobang a pan laha semhoi beding ham ti vetchil na neidin Mission Board thaheng in achesa 14th Aug 2018 ni chun Imphal Airport dalhan kana kalsong doh e.

China:

15th Aug. ni jinglam 4:40 velin China gam Kunming khopi kagalhung e. China gama dinga anakon doh Missionary Letminthang Haokip in kipah tah in airport a eihung lamton ahi.



China gam Kunming khopia mission natong din Mr Letminthang Haokip hi 2015 kumin anakisol e. Chujouvin aji Ruby Haokip jong 2017 kumin anakisol kit in ahi. China gama missionary ho natohdan pipen ahileh agamsunga khangdong English pao gelkhoh ho lah hi ahipenne. Amaho hin "English Corner" atiuvin English paova agam mi nungah gollhang ho toh kimu to na phat anei khom jiu vin ahi. Chinese nungah gollhang ahung pang ho chu akihet piuva loile pai a asem jiu va chujouleh anneh khom pidia inn a invite abol jiu ahi.

Ahung kivop doh teng uleh Pathen thu aseih jiu va Pathen ahin tah san tengu leh guhthim a Baptist abol jiu va tahsan na hong sunga ahin puilut jiu ahi. Hitabang hin aguh in Christianity hi akhang jing in tunin leiset chung a Pathen hou kibe tam napen gam ahung hitai. China gam to kisai ja Christianity chung chang a het dinga pha khat chu agama hin houbung jatni aume. Khatna a Government Houbung ahin chule aninan Inn Houbung ahi. Government houbung hi Govern-



ment in ahettep ahin chamlentah in Pathen ahoun ahin lah hitabang houbung ho ahin Pathen tahsan lou khatin Pathen ahin tahsan thei nading sermon peh akiphah poi. Langkhat a seidin Christa jalla Lhatdam na thupha hi kisamphong thei lou ahi. Houbung khantou nading le machal nading sermon vang itabang hijong leh seiphong



ding akiphah in ahi. Langkhat a Inn houbung ho a hin Pathen thu aguh in aseihun atahsan ho chu guhthimin Baptist abolun, inn sung khat a houinn akaikhom un, Government thunei na noi ja um louvin Christa thu nei na noi ja aum un ahi. Hitabang inn houbung a

kona hi niseh a tahsan cha kibe jing ahi.

Overseas Missionary Fellowship [OMF] lamkai pu le ajinu toh kakimu tou vin China gama Pathen na toh ding dan seikhom na kanei un ahi. Khopi sunga a um India mi ho se chu "Bharatian family" tin akipun khom un amaho chun jong kipah tah in eihung lamtou vin Anneh khom na jong einei piu vin ahi. Kunming khopi sunga missionary Mimin Haokip in Chinese pao ajil na mun International language School mun kagaven chule English class alah nahon school mun vil na jong kaga nei jin ahi. Munthupi phabep vilna kanei jin campus akon nikhatle Pathen hingjing houlamkai lentah tah hung so nadin Taona jong kamang ji lhonin ahi. Foreign gama kon hung ho Pathen hounading Houbung "Northship" a Sunday ni jing kah in kaga kikhom in ahi.

China gam hi lhangphong tah a Pathen thu kisei thei lou na ahi. Ahin agamhi vannoi leiset na Christianity khantou na pen ahikit e. Eiho jong agama missionary sol ihijeh un itaonao ga ahi. China gama missionary Letminthang le aji Ruby Haokip damsel le lolhing taha Pathen natong a apan jou jing hon nadin taonan gel doh jing u hite.

China gama kaum sunga Missionary Mimin Haokip in ahoithe pen le alolhin nathei pena eisasah a kimuto piding le vildinga kilom ho agontup soh a lolhing tah a kaga kiman thei jeh in achung a kipa thu akasei je.

Thailand:

21 Aug nin Missionary Letminthang Haokip SEA Mission Co ordinator to Chiang Mai Thailand kana jon suh lhonin ahi. OMF Center "Mekong Centre" a kalhung lhon e. Hilai muna hin Andrew Goodman, Director OMF Mekong Region kakimu pi honin Mekong Region na Pathen na tohkhom ding dan kasei khom uvin ahi. Aman asatah in Chingmai khopi jouse kimu thei na "Wang Bua Ban Pha Ngoep" kiti mun thinglhang lang a eina puihonin khopi hoina jouse kamu thei jun ahi.

22 Aug nin Bangkok khopi jonin kache suh kit lhonin OMF leader ho toh kaki mutokit lhone. Amaho centre a kalhun hona nikhat Bangkok khopi sung vilna kanei hon tilou kihoulimna thupi behset vang kanei tapouve.

Cambodia:

24 Aug. nin Cambodia khopi Phnom Penh kalhung lhonin Missionary Lhingneikim Haokip (Neosi) in Airport a eihung lahon in ahi. Nilhah lamin Yew On Choo Acting Country Director OMF International in ann nedin invite eibol uvin ann kananekhom un ahi. Sunday ni Jingkah in Baptist Church of Mizoram te Mission field a houin kakai khomun Cambodia gama Pathen na atoh danu kihoulimna kanei uve. Achesa 2017 kuma Missionary Neosi Visa muthei nadia eina kithopi nao chung a kipa thusei na kahin neijin ahi. Nilhah lamin Presbyterian Church of Mizoram ten Mission na atoh nao muna Pathen thusei naphat eipeo vin ahi. Mizoram Presbyterian houbung in jong Missionary Neosi hi 2018 kuma dinga Visa amuthei nadia anakithopio ahin achung uva kipa thusei na kahin neijin ahi. Mizoram houbung foreign Mission nato dan hi vetton thei tah in aume. Amaho hin gamlah dinga agel nao (missionary nato nading gam) muna chun Missionary Pastor khat panna in Missionary ni ahilouleh thumbeh asol khom un ahi. Mizoram Baptist le Presbyterian houbung teni hin anigel honin Dormitory ministry abol cheh lhone.

Phnom Penh kaum sung chun Cambodia history a suhmil thei lou "Tuol Sleng Genocide Musium" (gamsunga miching mithem ahaosaho jouse kisuhgenthei namun le "Choeung Ek Genocidal Centre" (Mihem aja aja a gari a kilhoh a mun khat a kitha namun) chu kaga ven ahi. Hiche lai munhi "The killing field" tin jong akihei. Hiche thilsoh hi 1976-1979 sunga Pol Pot lamkai na a gamsung mi kithana gimnei pen chu ahi.

Cambodia gamhi gamvaicha tah gamkhang tou loutah ahi. Ajehchu agamvai hinpoding aching athem jouse anakithachai u ahitai. Hiche gam hi Budhist hou tamna gam ahin, Communist kivaihom na noijin aum uve. Pathen houna lampanga hin akihong jepin agam khantou nading lampang to kisai ja natoh ipi kibol jong leh phal ahi. Hijeh a chu khangdong lekha them ho hi Pathen thu hetsah a amaho a akon nikhat leh gamsunga Pathen houna amachal ding deisah na jeh a Mizoram ten lekhasim college kaiho umnading Dormitory ministry abol u ahi. KBC in jong ipi pen ministry ibol dingu ham ti hi gelphat ahitai.

Laos:

28 Aug. nin Cambodia dalhan Laos khopi Vientiane jonin kana kondoh kit hone. Kipa umtah in Vientiane khopi sunga Indian Embassy a natong Sopi Kampu Kipgen le aji Grace, Missionary Sherlyn jaonan Airport a eihung lamtouvin ahi. Nithum sung ainna kaltung un anehtuidon ahoithei pen in eibol peh un insungmite chung a kipa thu seijou lou iphong uve. Amahi Kangpokpi akon ahin chanu ni anei hone. Missionary Sherlyn in tuni chana na atoh na Dinde Nursery & Kintergarten School director pan kaga lhun niuvin ngailiut ankong eisokhom piuve. Kimuto pidinga kilom OMF lamkai ho tojong kakitmutou vin, chule khopi sunga a Pathen natong organisation chom chom, Worldwide Evangelisation of Christ [WEC] Vientiane Laos, Grace International Church [GIC] Vientiane Laos Chule Youth with a Mission [YWAM] Vientiane laos lamkai ho to kimu to na jong akinei jin ahi.

Laos gama jong hi China banga Christianity hi lhangphong tah a kiphapoh thei lou ahi. Agam hi Budhist hou tamna ahin, Communist gam ahi. khantou na lampanga anemlkeh jeng nalai je. Gamsung Government in houdang pohlut hi aphal pon chingthei tah in agama cheng foreign miho hi vetsuina aneiun ahi. Agama Pathen natoh danhi khopi sung sangin thinglhang langa amachalin alhang pia seidin English school abolun hia chun Pathen thu hi athem themin jillai ho lung thim sunga chun akhum peh un ahi. Sherlyn atohna muna lamkai hon

ahomthouvin mopohna lentah tah pehdin aseu uve. Ahin lah KBC in atila pat eimachang kenga dina ministry bolding tia lungput kinei ahijallin olla kiheto kit din akigonge.

Pathen lungset in Foreign Missionary ho jouse hi agampao athem thei cheh taovin, natoh le tham sonlal ding aumtapouve. Gamsung ki-vaihom na ahethem taovin mabana KBC in ministry itabanga iboluva amaho mopoh na noiya hi itoh dingu ham ti hi gelphat ahung hitai. Midang noiya tonglouva eimachang ministry bol ding tihi migam a abaipoi. Amasa pena registered hi angaijin hichu bailam tah a kimu lou ahi. Sumlepai angaijin atongding mi solbe angije. Hitabang natoh ding hi itaonao hijing henlang ilolhin tokah un Pathen henga tao jing nalaiuhite.

31st Aug. nin Laos khopi Vientiane kahin dalhan ajing 1st Sept 2018 nin damsellin Imphal Tuliha Airport kahung lhung e. Kakhol jin na a damthei na kanei nadingle lolhing taha kahung kile kit thei nadia Pathen henga eitaopeh jing KBC houbung mite jouse chungu kipa thu kahin sei jin, chule tokhompi Mission Board in jong lunglentah a angaicha ahitia foreign mission field ho gavil lhadia thulhah na ahin neinao chungu kipa thu kahin sei je. Maban a jong Pathen in eipui uva Foreign mission field hi isuh pilhing jou nadiu vin taonan gel doh jingu hite.

KIPA THUPHON

Dam na jeh a kipa thuseina

Ka chapa Lunseithang amit kisuhkhah kho muthei talou lhakhat val RIMS a akijen in Pathen lungset a dam a kapotdoh thei tah jeh uvin, Adammo sung a thaleh jung sumle pai taona a eihung kithopi ho jouse adeh a Gambih No 7 Pastor Rev. Lamkeng Lhouvum ahin KBC office lam a kon lamkai teho in neikhohsah nao chung ah seijoulou kipa thu kahin phong e.

Pathen in ibon un phatthei na eipe jing tao hen.

Keima anu Tingneilam Haokip, T.Laijang Village, KBC Gb. No. 7

Women Column

Lhingjanem Haokip
Secretary, Women Dept. KBC(I)

13th ABWU Conference

Pathen lungsetna jallin achesa nisim 28th August, 2018 nikho chun Asian Baptist Women Union Conference 13th vei channa Georgetown Baptist Church, Penang, Malaysia mun a aumin ahi. Khoppi a chun Gam 17 a konin thalheng (Delegates) 700 vel akikhom doh in ahi.



Ajeh chu 2013 South Korea mun a khoppi a chu akit kikhopna dinghi Indonesia hidinga anum chu ningkum a Khoppi len analah phat uva Penang tehi Emergency a apah-u ahijeh in, ami tamlou ahivun Delegate hi 1000 limit ahin peh uleh hichenghi ki kikhom doh joubep anahie. Tuchung Khoppi Theme chu ahileh: "Created, Redeemed and Transformed." ahin, Khoppi nilhah nichanna jan in Gurney Hotel mun a ABWU kum 60thlhinna Golden Jubilee Celebration jong loupi tah in akimangin ahi.

Tuchung khoppi a chun MBC a konin mi 14 aki kalsong doh in, 14 lah a chun KBC mi 6 kapangun, Mizoram Baptist a konin 18, EBC Paite ho 9 chuleh Tripura akonin Mizo mi 7 ahivun, Chin Kuki Mizo sunga dingin mi delegates 40 kagapang un ahi. Penang hi Malaysia gamsunga State khat ahin, tuikol sung, 1,000Sq.Kms. bep ahin, agam athengin khopi neo-cha ahivangin akhangtouvun, Chief Minister jong Chinese Baptist Christian ahin, Khoppi a jong nilhah khat mipi kaikhomna a Greetings ahung seiyn, chutia mi atambah sehlou vangin kimanchahna ho jong anomin, lhunna-gena jong akitup lkeh in ahi. Tuchung khoppia kon'a kamudoh juindinga phatah khat chu; Kiseingaina, Kilungkhatna, Kithokhomna le Panlah khomna kiti hi nasatah in alah uva akimun, lhomcha ahijeng vangun thil jouse kitup tahin abollun 13th ABWU Conference Cum Assembly chu phatah le lolhing tahin akimang khomin keiho jong damsella in lam kahung kile tauve. Pathen thangvah in umjing hen.

LYDIA CENTRE VILNA HUNGNEI HO:



Dated 1/9/2018 (Saturday) nikho in Gambih No.8 Nute lamkainan Gambih Pastor toh Lydia Centre thilpehna le taopehna pumin eihung villun, achung uvah kipathu sangtah kahin phongin ahi. Lydia Resources Centre hi KBC Women Dept. lamdoh, KBC Gou le Ministry, Gambih No.8 a-um ahitoh Ihonnin kumseh le Gambih No.8 Nutehon taona le thilpeh pumin ahung vil jingun chuleh Gambih dang dang honjong hitichun ngailutna neitah in ahung viljing uve. Tuchunga Ngailut Thilpeh kimu ho: Paisa =8,800/-, Anchang = 1 bag, Salt =1packet, Soap =2pcs., Toothpaste =1pc. ahi. Avellin Gambih No.8 Nute jouse le Pastor pa Pathenin phatthei bohchek tauhen.



Dated 2/9/2018 (Sunday) nikho in Gambih No.15 Choir ho le Pastor Haopu Haokip, Principal, Dr.Colvin Academy in Lydia Resources Centre vilna ahung neikit un, Dangka 500/- chuleh Taona giltah Pastor pun amunna umjouse dingin amangin ngailutna jalla eihung viljal un kipathu sangtah akiseiye. Pathenin Choir members, Lamkai chuleh Pastor pa phatthei bohjom jing taken.

Phatle nikho ahung chechen kumkim ahung hi toh lhopn in KBC Youth Department jong Pathen mapuina jallin ahung chejingin, hito lhon chun KBC Youth in ahetlouva khoh phabep anoija hin kahin tahl-ang nom in ahi. Gambih hihen Houbung tin hijongleh Youth Lamkai jousen ina hetcheh diuva temna le hetsahna kahin nei ahi.

YOUTH ANNUAL ASSEMBLY

Tukum Youth Annual Assembly hi KBC Gambih 17 a Centre Church, Chassad mun a umding hitoh lhon in kigotna phatah in achelha jingtan ahi. Hito lhon chun KBC Houbung kiti taphot sunga Youth Work Committee a pangjouse thonlouva hung pang cheh dinga temna sangpen ahung kineije. Gambih Youth Work Committee cheng jong thonlouhel'a pang cheh din kigotna neijing utin Gambih sunga Houbung hoa Youth lamkai cheng jong hetsah jing ute. Assembly nikho dinghi KBC Events a toh kibang talou ding 12 December 2018 Lhunkim hiding 15 December 2018 nikho hi Kikhenna hita ding ahi.

BYPF OFFERING

BYPF hi lhaseh leh Last Saturday nilhah kaikhom hi akimang jingin ahi. Hiche nilhah a kaikhom hi Prayer Fellowship ahijeh in kaikhom dangbang louva jong ibol jing diu tahsan ahijenge. Hito lhon chun lhon hen lang tam jongleh KBC Youth Department a dia tolom jong idonkhom jidiuhi inachepijing u khat ahi. Ahinla BYPF Offering pa hi Office langa Gambih khat le ni a kalvallin ahung kithah khanaipon, hijeh chun KBC Houbung jousea Youth lamkai hon ihetthem uva ikil-olnau banga panhila cheh din taona ahung kineiyee.

YOUTH EMPLOYEES DAY OFFERING

Tukum jong Youth Employees Day manna ding chung a chun Pastor jouse le Houbung jouse lekha thot ana kineisohkeijin, hito lhon chun Houbung jousen Youth Employees Day nikho ahet cheh din katahsan in chule nit jong anit teidingin katahsan in ahi. Hiche nikho a jonghi KBC Youth Department kithopina dinga tolom jong idonkhom jiu ahijeh in Houbung jousea Youth Employees Day tolom jong Office lam'a phatah a ithah cheh diuva temna le taona ahi. Hijeh chun Houbung tin'a Youth Lamkai cheng le Gambih a Youth Lamkai chengin pang hinla cheh din jong temna ahung kineije.



KBC CENTRAL CHOIR IN TULE TUA VISUAL ALBUM ATHAH KHAT RECORDING LEH SOOTING ACHELHAH LAI TAH AHI

Consultation on One-day Intellectual Circle on Education



Sept. 6 Thursday nihin Education tohgon dungjuijin One-day Intellectual Circle on Education ti Consultation prog. Pathen lungset in lolhing tah in akicchal lhatheitan ahi. Akikou ho lah a ahungpang theilou phabep umjong leh ngailut jal'a ahungpang thei ho chungka kipa thu sangtah in akiphonger. Hichea kihoulimna a kon'a maban leh Education tohgon thah machalna tamapi kichwepi theidingin aumtan, chule Houbung mitwen jong tutu a Mission igelkhoh banguva Education jong tanggol a igelkhoh diu angaijin ahi. Pathen in malam ah lolhin na'n eipuijing tauhen.

BQ QUEST

October 14, 2018, SUNDAY

Kumseh a kibol jing Bible Quest hi tukum in jong aphant le anikho akitepna dungjujin ahung nai tultul tan hito lhon chun August sunga Form jouse office a hinhah lut dinga jong hetsahna kineisa ahito lhon in Exam a panla cheh dingin kigotna neijing pum in ana galdot jingt taute. Anoiya hi Exam Center ho kahin tahlengin iham tia sukhel, akhelnom aumkaha leh Youth Secretary pa kijahmat pi dingin temna ahung kineiye.

BQ 2018 EXAM CENTERS

IMPHAL GAMKAI

1. KBC Houbung, Newlambulane
2. KBC Houbung, Langol
3. KBC Chapel Hall
4. KBC Houbung, NGV
5. KBC Houbung, Lamphjel
6. KBC Houbung, Canaan Veng
7. KBC Houbung, K. Songlung
8. KBC Houbung, Maphou
9. KBC Houbung, Leimakhong

ZALENBUNG GAMKAI

1. KBC Houbung, Zalenbung
2. KBC Houbung, Pashong
3. KBC Houbung, Songphel
4. KBC Houbung, Phailengkot
5. KBC Houbung, CEC School Semol
6. KANGPOKPI GAMKAI
7. KBC Houbung, Kangpokpi

TWILANG GAMKAI

1. KBC Houbung, Songjang
2. KBC Houbung, Kotlen
3. KBC Houbung, Tujangvaichong
4. KBC Houbung, Govajang

SAIKUL GAMKAI

1. KBC Houbung, Saikul
2. KBC Houbung, Pangjang
3. KBC Houbung, Molkon Bazaar
4. KBC Houbung, Gampum

SAPORMEINA GAMKAI

1. KBC Houbung, Salem Sapormeina

NK MANBI GAMKAI

1. KBC Houbung, NK Manbi
2. KBC Houbung, Khoken
3. KBC Houbung, Joujangtek
4. KBC Houbung, Tingkai
5. KBC Houbung, Sajal

SINGNGAT GAMKAI

1. KBC Houbung, Singngat
2. KBC Houbung, Haijang

CCPUR GAMKAI

1. KBC Houbung, Hill Town
2. KBC Houbung, Kulbung
3. KBC Houbung, Twinom
4. KBC Houbung, Matalambulane

TUIBONG GAMKAI

1. KBC Houbung, Tuibong
2. KBC Houbung, Kanan Veng
3. Logos School B. Vengnom
4. KBC Houbung, T. Champhai
5. KBC Houbung, Matejang
6. KBC Houbung, M. Tampak

SANGAIKOT GAMKAI

1. KBC Houbung, Sangaikot
2. Sugnu Mission Center
3. KBC Houbung, Govajang
4. KBC Houbung, Lungngil
5. KBC Houbung, Songpeh

CHAHKAP GAMKAI

1. KBC Houbung, Chahkap
2. KBC Houbung, Aigejang
3. KBC Houbung, Lonpi Khunnou

KHENGJOI GAMKAI

1. KBC Houbung, Khengjoi
2. Dingpi School, Khangbarol
3. KBC Houbung, Molcham
4. KBC Houbung, Songjang
5. KBC Houbung, Tujang

GAMPHAJOL GAMKAI

1. KBC Houbung, Gamphajol

MOREH GAMKAI

1. KBC Houbung, Moreh
2. KBC Houbung, Chavangphai

PALLEL GAMKAI

1. KBC Houbung, Molnoi Area
2. KBC Houbung, Saivom
3. KBC Houbung, Phalbung

CHAHSSAD GAMKAI

1. KBC Houbung, Chassad
2. KBC Houbung, Maokot
3. KBC Houbung, Molvailup
4. KBC Houbung, Lanchah
5. KBC Hopubung, Lakkan

KARBIANGJONG GAMKAI

1. Amrajan Mission Center
2. KBC Houbung, Molsang
3. KBC Houbung, Khoding

E. MULAM GAMKAI

1. KBC Houbung, E. Mulam
2. KBC Houbung, Gangpijang
3. KBC Houbung, H. Champhai
4. KBC Houbung, L. Salemphai
5. KBC Houbung, K. Moulpi
6. KBC Houbung, Twisomjang

BONGMOL GAMKAI

1. KBC Houbung, Bongmol

NAGALAND KBA

1. KBA Houbung, Khaibung
2. KBC Houbung, Ahthibung

PUNE KHOPI**SHILLONG KHOPI**



KUKI BAPTIST CONVENTION



Literary meet 2018

65th Kuki Baptist Convention General Assembly (Centre Church, Kangpokpi mun) a kiphat sahana dungjuiyin, Lietrature & Publication Department vaiasaina in achesa 19th August, 2018 (Sunday) nikho chun Centre Church, New Lambulane, Imphal mun'ah KBC Literary Meet - 2018 chu lolhing tah in anakimang tan ahi. Akigong duijuia phat le nikho phatah le lolhinna eipeu Pa Pathen thangvahna ipeuvin, loupitah a kin lolhin sahna a gunchu tah a pan hinla ho - kitetna a pang (Competitors) ho, kitetna vetoh a pang (Judges) ho, Programme a pan laho, kimanchahna ding mun le tha pan a pan la Centre Church, New Lambulane (Host Church), Camera men ho, chule kin a hunglha nu le pa loi le gol, Convention lamakai ho, gambih lamkai ho, Pastor ho le houbung mite jouse chungah Literasture & Publication Committee (Organizing Body) in Pakai minin kipa thu sangtah ahung kiphonge. Kitetna chom chom hoa sangtah a panchanna chung nung ananei ho chu mipi het thei ding anoiya hin ahung kitah lange.

Sunday School Simmun bua kon Thudoh (Quiz) Kitetna

Senior 2	First	: Gambih No. 04
	Second	: Gambih No. 01
	Third	: Gambih No. 05

Philhing	First	: Gambih No. 01
	Second	: Gambih No. 03
	Third	: Gambih No. 05

Lam la (Choreography) Kitetna

First	: Gambih No. 04
Second	: Gambih no. 01
Third	: Gambih No. 09

Chang lasah/Sunday School Icon Kitetna

First	: Nengngainem Haokip, C.Ch., Langgol, Imphal, Gambih No. 01
Second	: Nengpilhing Doungel, Molkon Khopi, Gambih No. 03

Third : Lunkhopao Khongsai, Kulbung, Gambih No. 09

Thumun khat Chungchang jih (Essay Writing) Kitetna

First : Jangminthang Haokip, Baptist Church, Chassad Avenue, Gambih No. 01

Second : Nemhoiem Haokip, G. Kholep Baptist Church, Gambih No. 04

Third : Satkholen Haokip, Twinom Baptist Church, Gambih No. 09

Zaila jih le sim (Poetry Writing & Recitation) Kitetna

First : Seiminlen Dimngel, Centre Church, Haokip veng, Gambihy No. 01

Second : Lhinghoikim Haokip, N. Songlung Baptist Church, Gambih No. 04

Third : Lamminchong Haokip, N. Songlung Baptist Church, Gambih No. 04

Lim jih le jep hoi (Painting) Kitetna

First : Khaiminlun Haokip, P. Gelmol Baptist Church, Gambih no. 08

Second : Paokhotinchon Haokip, G. Kholep, Gambih no. 04

Third : Seiboilen Chongloi, Gambih No. 03

Zaila (Poetry) a Seiminlen Dimngel, Centre Church, Haokip Veng, KBC Gambih No. 01 First Position lapa Zaila jih anaveu te.

CHRISTIAN KHANGDONG HINKHO

*Nin nom taangkho khangnou pah bang pah o
Sun lai nibang a emjing khangnou.
Na tongso ngei lhaangdam twibang chu
Semjang saigin thon Christa vahchoi jingo;
Aw Christian khangdong.*

*Jemkai tongkai thon lhangsam son no
Christa mintheng setlei Zalaija.
Piengthah khangnou na tongnem Zaila oi tangem,
Chungmang Pa lunglhai phungvuh changdin;
Aw Christian Khangdong.*

*Pentil dolla atwi vabang nahin jilla
Nachun le najo selung toh jingo,
Nampi khompi, nampi le chun le jo kinepna.
Christa min song pumin naban jang tha pantan;
Aw Christian khangdong.*

*Nin nom vangkholaai houbung jemhoi,
Jing niso embangin Christa din emjingo.
Chung Pathen min loyang thangsah jing din,
Maimit sing mang lou jeno lhagao galsat jing;
Aw Christian khangdong.*

VACATION BIBLE SCHOOL (VBS) MATERIALS

Koitobang Vacation Bible School (VBS) bolnom houbung ho dingin tulai khang to kitoh a kiseum jilkung (Teacher) ho manchah ding le jil-lai (Student) ho manchah ding lekhabu, Choreography/Action la, Visual Aids le adang dang phatah tah ho adei/angaicha aumle Literature Secretary to kihet toa muthei ahi.

Pastor Haoneo Haokip
Secretary
Litrature & Publication, Kuki Baptist Convention

Education Column

Hetsah le temna

Pakai lenggam a tohkhompi Gambih le Centre Church a Pastor, chule Houbung lamkai ho hetsah nom chu, Edn share anakihoppeh ho lah ah 40% vel in ahinpethei taovin, achunguva kipathu kahinphonge. Ahinpelou laihon ahitheih leh agangtheipen in hinpeleu hen phalheh inte, ajeh chu kumsung a tohgon ho tohdohna din phat akinolheh jengtan ahi. I Corinth 9:23 a mitheng Paul'in "Kabolchan hi kipana thupha thu a hi chan kaneitheina dinga kabol ahi" atibangin eihon jong KBC le Pakai lenggam machalna dinga ibol u ahi ti geldoh pum in pan lacheh ute tia Pakai min a kahin tem u ahi.

Kumseh a KBC Edn Board mopohna a Scholarship ana kihomji chu kumthah lam leh 65th Assembly, C/C Kpi phatsahna dungjuija Theological Board mopohna joh a kihom ding ahitah jeh in Apply bolnom hon Theological Board kom joh a iboipi tah diuvin ikihetsah uve. Chule lhomcha hijong leh Scho. anakipe Candidate hon vai khonung geija a 'Thesis' u manlutah ho leh a Result u chu KBC Office'a copy khat ahinpeh cheh diu akingah jingin ahi. Hiche hi koi mopohna hijong leh kumseh a chepijing dinga thilpha ahi.

Rev. Onthang Haokip
Secy.Christian Edn Board(KBC)

LUNG HEMPI NA



Pu Jangkholet Haokip 1928 - 2018 (13 Sept.)
F/O Pastor Onkho Haokip
Pastor Centre Church, New Lambulane, Imphal



Pi Ngaikhoneng Haokip 1926 - 2018 (14 Sept.)
M/o Miss Lhingjanem Haokip
Secretary, Women Department, KBC



Pi Hatkholhing Haokip (1930 - 2018) (14 Sept.)
M/o Rev. Paojangam Haokip
Pastor Gambih No.1 KBC

It umtah Nu le Pa cheng hin gelphah louva eina dalhah na chung uvahin KBC Houbung mite jousen lunghem pi na ahung ki phong in, adalhah a insung mite Pathen in lungmon na petahen.



One-day Intellectual Circle on Education Consultation program KBC Chapal Hall mun ah september 6 nikhon Education Board makainan ana um in ahi.

1st September nin Gambih no. 8 Nute Anngol taona C/C.M. Thingjaboung mun a ana kimang tai.



5 Aug nikho KBC Gb. 8 T. Khonomphai B/Church Gambih Pastor Rev. Thanglen Haokip in Apa, Acha chuleh Lhagao theng min in kot honna ana tai.



Post Regd. MNP/81
Regd. No. 18134/83

VACATION BIBLE SCHOOL!

Group
East, Middle, West
India

Chate dia lhagao leh thasa agom a khantou nading
a kitem VBS lekha bu kiman tah a muthei ahi

The Easy VBS.

MAKER FUN FACTORY

Created by GOD
Built for a Purpose

Hiche VBS hi
tulai khantou
natch kitoh a
chapang heding
a kigeung
ahi

VBS Theme: Maker Fun Factory

Chihil a muthei: Lekha choreography/Action Laa
chapang ho kihil nading a manchah - Visual Aids

Hiche VBS manchah dei hon KBC office
a manbei tah a muthei ahi

Koitobang Vacation Bible School (VBS) bolnom houbung ho
dingin tulai khang to kitoh a kitem jilkung (Teacher) ho man
chah ding le jil-lai (Sturdent) ho manchah ding lekhabu,
Choreography/Action la, Visual Aids le adang dang phatah
tah ho adel/angaicha aumle Literature Secretary to kihet toa
muthei ahi.

Contact : 9089593092

If undelivered, please return to
The Editor - KBC Thuso
KUKI BAPTIST CONVENTION
Opp. DM College, Imphal - 795 001
Contact: 9862633173